

بِحَقِّهِ

الكتاب: بهجة
المؤلف: ولاء سمير
تصنيف الكتاب: شعر
الغلاف: محمد عبد القوي مصيلحي
رقم الايداع: 2015 / 27079
الترقيم الدولي: 978.977.776.157.4



طباعة وتوزيع الكتب فى جميع انحاء العالم
المكتبة والمطبعة ، 3 ش صفوت محطة المطبعة
شارع الملك فيصل . الجيزة
جمهورية مصر العربية
01229300029 . 01157760052

مدير الانتاج : أحمد عبد الحليم

رئيس مجلس الادارة : عماد سالم

بريد الكترونى : yastoron@gmail.com

موقعنا على الفيس بوك : مؤسسة يسطرون لطباعة وتوزيع الكتب

جميع الحقوق محفوظة للمؤلف

بجھتے

ولاء سمیر

الإهداء

إلى روح أبي الحبيب (رحمه الله).
إلى قلب أمي الحنونة (أطال الله عمرها).
إلى أختي وصديقتي وطفلتي (ليان).
إلى كل من ساهم في خروج هذا العمل للنور.
أهدي ثالث أعمالتي

ولاء سمير

كذب ملون



كذب ملون

كذب مزوق في الأعياد
كذب لابس لى بدلة سواد
كذب محنى إيديه وسعيد
كذب غنى أو كذب فقير

كذب وماسك وردة ف إيده
عارف نفسه
واللى يقوله يعيده
كذب بيوجع قلبى وعينى
كذب ملون بالتكشير

عيط لما عينيه احمرّوا
يرقص لما يشوفهم مرّوا
والجنمات فى إيديه اخضرّوا
عقله اتوقف ع التفكير

كذب بلون الفرح
وكذب بلون الجرح
وكذب بلون الفرقة
مابيعرفش المكسب

هو اتعود يكذب
عمره مايعرف يتعب
يعرف يخدع صاحبه
زى ما يعرف يحسب

وقت الصدق بيان
التفانين ألوان
مابيعرفش يذاكر
بس بيعرف يلعب

يمكن عدى وسافر
يمكن جاب م الآخر
أنا صدقت حكايته
لما قدر واتمكن

احنا معاه عارفينه
بايع ناسه ودينه
ممکن يصدق مرّة؟
لكن ده مش ممكن

إنه يكون لى صديق
جنبى ف وقت الضيق
أنا وياه راح اسلم
بس على الصادقين

غريزة



غريزة

العصفور خاف الصياد
بس اهو طار
واللى اتغرب جانا جريح
ومعاه أسرار
والأعياد بتجيب أعياد
والأسوار تعمل أسوار
والأولاد ضايقوا الأولاد
ليل بيطول ع الدنيا دى
لكن بعده بييجى نهار

الأحزان بتربى جروح
لينا جناح وأمل مدبوح
واقف بس يعدى اصحابه
والتانيين يولعوا بالنار

كان عصفور بيحب جيرتنا
شُفنا جماله وابتسامتنا
لما وليفته سابتنا وطارت
ساب الجيرة وعدى وطار

وشين



وشين

عُملة اتقسمت نصين
فرحان وحزين
حُرو ومسجون
وأدينا على دى الحال ماشيين
واخترلك وش من الاتنين

وش بمنظر غير التانى
وش حقيقى ووش أنانى
وش يبجح فى اللى عارفهم
وش يقول للناس سامحونى

وش يقول والتانى يدارى
واحد مائى وواحد نارى
وشين متضادين أعداء
خايف اقول لا الناس ياكلونى

هو طريقه وعارفه ودارسه
هيسمّع لك بكره مدارسه
مش هيسيبك تكسر نفسه
يقلب وقت الفرح عواء

مين يتعلم من أخطائه؟
مين في اصحابه الحلوين طاقه؟
والا نزل ومسك في خناقُه
يعمل م الخناقات أرزاق

دقت كتير وعرفت كتير
رشة عطر وغنا عصافير
سوق الكذب وله أصحابه
وش الشر ووش الخير

طعم الهوى



طعم الهوى

وأنا مخلصماك باكون عايزة
أقول للورد فين بيروح
خلاص ناسى مواعيدى
تقول لى هيبجى ما تخافى
حبيبي فى الخصام مجنون

لكن يرجع لى ويقرب
أنا بابتعد وهو قريب
يافرح العمر لسه حبيب
باقول سيبنى وبتسيب ليه ؟
وكان طعم الهوى طيب

باشم الفرحة جوة عينيه
واشوف الضحكة خجلانه
شجر دبلان من الفرقة

وأحزاني ماتتعب

ومين مظلوم ومين جاني؟
ومين ع القسوة قواني؟
وكنت باقول له ماتسيبني
مع إني بادوب له حنين

وانا مخاصماه باكون ويّاه
إذا غنى باغنى معاه
وأحواله بتوصل لي
وأنا عارفة طريقه منين

أكيد لسه الجواب حراق
ونصه عتاب ونصه فراق
أكيد باشتاق يانور العين
أكيد لسه الكلام دافي

وجيت في الحلم زي ملاك
وتنده لي أروح ويّاك
واقول لك روحى ملك إيديك
وأسقيك الغرام صافي

أول خطوة



أول خطوة

أول خطوة ف عمري مشيتها
آخر خطوة أكيد هامشها
بسمة قلبي معاك يا حياتي
تسوى الدنيا والى عليها

باحسب عمري معاك بالثانية
مين الأولى ومين الثانية
عمري ابتدا وياك وباحبك
طوبة وطوبة انت اللى بانمها

ياغنوة قلبي يا حنين
يا طفل وقلبه بيسنن
ياغنوة رقص لها قلبي
معاك عزفت معانمها

دموع القدس



دموع القدس

انت يا قدس ف قلبى وعينى
م اللى بيحصل قلبى حزين
ولا بتناورى ولا بتكابرى
لكن تندهى ع الغايبين
عندك شوق وحنين
لكن اولادك هجروك
وقت الأزمة إزاي يسيبوك؟

انتِ أملنا ومالناش غيره
عارفين شره وعارفين خيره
بيصبح ع الورد النادى
فرحك فرحى
دمك دمي
ابنك ابني
لو تندهى بيقول يا بلادى

وانت ياقدس تنادى علينا
نصرالقدس دا كان بإيدينا
سيبنا اولادنا وباصين برة
شافوا القسوة وعرفوا المرة
مهما الظلم تطول أيامه
إنتِ هتفضلى جوة عينينا

ألف تحية لجند بلادنا



ألف تحيه لجند بلادنا

ألف تحية لجند بلادنا
دولا الأهل ودولا اولادنا
لويشبعوا راح يكثرزادنا
قد الدنيا ونفسه رضيّه
ألف سلامة وألف تحية

رمل الصحرا بيعرف كدّه
عارف أرضه وعارف بلده
وبدعواتنا كتيرهنسانده
بعد ماتبقى الكف عفية
ألف سلامة وألف تحية

هو بيحمى الأرض بدلنا
تسلم إيده ويسلم زنده
يحمى تاريخنا ويحمى عيالنا


هو صحيح غنوة وعربية
ألف سلامة وألف تحية

زلزل تحت الأعداء ناره
هو بطل والنصر قراره
وان عرفنا كثير أسراره
برضه كتوم والهمة قوية
ألف سلامة وألف تحية

عنده النصر وعنده شهادة
عنده القوة وعنده إرادة
لو هتعد ولو هتجاسب
احسب قوة واحد مية
ألف سلامة وألف تحية

مين في العالم يا ابني ينافسه
حرر أرضه وحرر نفسه
هو شرفنا الى بيحميننا
م الأوهام ومن العبودية
ألف سلامة وألف تحية

البيه الكداب



اليه الكداب

ماشى ف إيده كتاب
اليه الكداب
اللى مايعرف يقرا
قبل ما يغلط تاب
اليه الكداب

وردة ف وسط العروة
بنت جميلة وحلوة
سيبه يكمل نصبه
من غير لوم وعتاب
اليه الكداب

اللى ف ايده قليل
واللى ف عقله هزيل
والشقة اللى ساكنها


من غير شيش ولا باب
البيه الكداب

يفشر لما يقول
عائش كده مسطول
ومصاحب ناس وحشة
ويقول عندي حساب
البيه الكداب

ماشى أمير بدلاله
لبس جديد يا جماله
عازم عمه وخاله
أكله حمام وكباب
البيه الكداب

صاحب قرش اصحابه
بس البيه يا عذابه
شرب المروجابه
للى مالوهش مناب
البيه الكداب

هات وخذ



هات وخذ

محتاجين تغيير كثير
محتاجين ثورة ضمير
فوضى ما تخبزشى عيش
والفقير مقصوص له ريش
والغنى مايمه حاجة
والغنى عامل وزير

الى ضد الناس بلاش
عبي كرشه وما اكتفاش
والفقير بيروح بلاش
يبقى مجهول المصير

نبقى محتاجين ضمير
صبحوة فى البيت الكبير
محتاجين ثورة مبادئ

للصغير والكبير


محتاجين الناس تساعد
الى واقف واللى قاعد
كل واحد واللى عنده
دا الفراغ أصبح خطير

حاجة بس تكون قوية
مش تفاهة وعنترية
حاجة للى يحب بلده
حاجة معمولة بضمير

محتاجين للأزمة راجل
محتاجين للحب رقة
حل يبقى صحيح وعاجل
بس إيه هى القضية ؟

محتاجين النفس حرة
محتاجين فرح ومسرّة
إيد بتزرع مش لبرة
مش بتستنى الهدية

اختلافنا حرب



اختلافنا حرب

كنا صحبة وكنا أهل
واختلافنا بسيط وسهل
واللى ما بيعرفش يعرف
واحنا ما نشجعش جهل
فى اختلافنا

كان زمان حزن و صفا
كان زمان وعد و وفا
والقلوب تصفى لحبيها
والبيوت زادها الدفا
فى اختلافنا

احنا مش عارفين طريقنا
وانطفى دورنا وبريقنا
والإيدين ممدودة دايماً

من زمان ما اتبل ريقنا
في اختلافنا

ديّ حرب مش اختلاف
ده وطن محتاج عينين
محتاج قلوب
بتضم بعض
خايفه ع الزرعة اللى دبلت
ع الولاد
واللى ما يبسمعش شاف
في اختلافنا

وردة حزينة



ورده حزينه

أنا قاعدة ف صحبة ورد
عينين صابحه زايها الود
وانا وسط الإيدين واقفة
مع اصحابي ودموع***ع الخد
وانا حالي مع كل البشر ..
زينه

تشوفنى العين تقول الله
جمال الورد ما أحلاه
لكن عينهم ولا بتشوف
دموع الحزن ويا الخوف
وانا حالي بيشبه ناس
رضا وإحساس
ويوم ورا يوم
بتصحى غيوم
تزيدنا هموم

سهر بالكوم
ولا واحد صعب حالي
عليه أورق
وقال يا حرام
ولا يمسح دموع عيني
ولا ينور قناديلي
ولا يمنع إيدين المجرم الجاني
وهو بيقصف الأعمار
بني فرحه على حزني
ثمر نواره بيفتح
وسنه ضعيف ولا يجرح
لكن هي الحياة قوة
وفها الضعف
ووقت الفرح مستنى
وعمرى يومين
وباقى العمر كله حزين

الخلاص



الخلاص

برغم التوهمة باتعلق في حبة ضيّ
في حبة صبر واتصبر
واقول يمكن في يوم أقدر ..
أكون قدك
وباتصور
وانا باحضن عيون الضل
بان الكل عارفّي
وإني باسكن النني
وإني بافرد الأيام
واخطى من ورا الأحلام
واحقق فكرك عني
لكن خوفي بيهزمني
واخلص نفسي من نفسي
لكن روعي بتنلمني

الحلم



الحلم

أنا مجروح
لكن إيدك ضيا روى
وبتطبطب على جروحي
وأقول اصحى ياأياى
تقوم تجرى
ووقت الفرح بابقى معاك
ووقت الحزن بابقى معاك
خليط م البهجة والأيام
وأحزانها
وانا شايفة الحياة حلوة
وأنا شايفة القلوب صاحبة
وانا حاسه الإيدين مجاديف
وباحلم أبقى حبة قمح
ومسقى وضل
عليه عصفور بينقر على بابى

أزّيح الحزن من عيني
وألّون كل شئ في الكون
بلون أخضر

احنا معاك



احنا معاك


إيدنا في إيدك احنا معاك
ارمى هموم الدنيا وراك
بكرة هيحلى ويبقى الأحدى
لسه الدنيا بتستناك
إيدنا ف إيدك احنا معاك

تلقى الدنيا حزن كبير
فمها الفرح وفيها الخير
والعصافير بتطير بتطير
والدنيا كلها فاهماك
إيدنا في إيدك احنا معاك

بكرة شبابك يفتح بابك
يفرح بيك أهلك واصحابك
لو يوم حلمك عدّى وسابك

فرص الدنيا بتستناك
إيدنا في إيدك احنا معاك

الوعد والمكتوب



الوعد والمكتوب


قمر في الكون وجا جالها
على كتفه خيطان شالها
دفع أجرتها ومشالها
وباس أيدها وقام شالها
وحط أيديها جنب أيديه
وكان من بدرى ع الشباك
وانا من بدرى باستناك

في غيظه نخلة يطلعها
يشوف أحزان يبيلعها
حمى الفرسة من التشريد
من الندل اللى جوّعها
وقال انا جاي
وانا من بدرى باستناك

وطول العمر بنضحى ونشقى لها
وإحنا كل راسمالها
نكون أولادها فى الشدة
ووقت الصلح والأزمات
بنبقى عمها وخالها
وأنا من بدرى باستناك

ودادك كلمتى عهدى
وده وعدى
ونصرك دين
ولما إيدينا نفردها
تضم الإيد حبايبها
وانا من بدرى باستناك

مراكب عشق



مراكب عشق

مراكب شمس بتعدى
على الحالمين
وقلبى عاوزها مركب شوق
تغنى للحبيب غنوة
وفى رقبتي مزينها الأمل الاخضر
وانا وانت نبص لفوق
صبي مجنون
وبيشاور لأيامه
لأحلامه
ويحسبها فرح مجنون
وليل مسكون
وبكرة بيتعزف غنوة
بتحلى بيها أيامه
ولو ضاع منا حلم العمر
نعيد الحلم من تانى

ونرجع برضه نحلم بيه

نغمّض نبقى قدامه

ونرسم ع الوشوش بسمة

وكان القلب متكرمش

فنرسم كون بيشهنا

كما صورة ولد طائر

يجيب الحلم م السنوات

طريق واحد

ويرجع منه بعد ما حقق المطلوب

لا هزه دموع

ولا مطبات

ولا نظرة ولا مصدّات

وناب لو يظهره عاقل

ويتكاتروا عليه مجانيين

هيتاخر

وم الآخر

مافيش أحلام على قدك


فسيب الحلم يبقى نهار

فلك دوار على المخاليق

وشوف السكة تفرق إيه؟

ولا تفرق!

عيون دباييس



عيون دبايس

محاوطانى عيون دبايس

وروح إبليس

ونار غيرة من الألاضيش

وحب مافيش

ونفسى أعيش على راحتى

مافيش ولا عين مراقبانى

منين جيتِ وفين رحِتِ

وليه غيرتِ عنوانى

وانا الجانى

ومهما احلف تكذبني عيون الناس

مافيش إحساس

مافيش ولاحد يعرفنى

ويعرف إن انا وقلبى

قمر وئاس

تعبت خلاص

ونفسى اصرخ وظالمى
وقالوا كلام
وشايفين الغلط مئى
ويرموا سهام
كفاية حرام
لا عنت أقدر على ده الحال
ولا هاقدر على الأيام

وحدي



وحدي

وانا وحدي
بأخطى وشايفة أحلامى
باعدى من ورا خوفى
وواثقة وباصة قدامى
كلامى عن جراح الناس
دوا وطبيب
وقلبى روحه فى الإحساس
ولى حبيب
لكن تايهة ومش لاقياه
وألفين آه
على القلب اللى ما اتهنش
على العمر اللى راح ولا جاش
على فكرة بقت ذكرى
على الحب اللى عمره ما عاش
على الجرح اللى مش ناسياه.. وألفين آه

باموت



www.kdcartoon.com

باموت

والله باموت
وعيونك مش راضية تشاور على أمها برّ
المطرة بتنزّل ع الأغصان
والدنيا ربيع
وأنا عايشة ف حرّ
أيام بتمرّ
وأنا وحدي في دنيا معانداني
أبواب مقفولة
أفتح باب ألقى التاني
ناسياني الفرحة
ومش عارفة غير طعم المرّ
والله باموت
وعيونك مش راضيه تشاور على أمها برّ

الشوق سلطان

وانت السجان
الى قيوده بتريح قلبى وترضينى
وانت سنيى
وسلطان الكون
والضئ الهادى المتربع
جوة ف عيني
وباخى غرامك جواى وغرامك سرّ
والله باموت
وعيونك مش راضية تشاور على أيها برّ

بهجت



بهجة

بعد يوم زحمة
بعد نوم قلقان
بعد شمس عفية بتشاور لأحلامى
بالاقي حلمى قدامى
واقول يارب يتحقق
ويكتب لى الهنا والخير
وانا راضية أدوق الظلم
ولا أقبل أكون ظالمة
هموم عِكرة
عينين ضلّمة
لكن عيني على بكرة

ليان روحى عصير القلب
عصافير الوداد جنة
وكف اتحنى قبل العيد

مع الكف الى ماسكة ف إيد
وايد فاضية
ومستنية يوم العيد
حبيب في الغيب
على حصانه الجميل الابيض
وانا واقفة وباستناه
ياريت حلمى يكون وياه
واقول رزق الصبيّة حبيب
ورزق الطفل أم حنون
وانا باستنى وعد الله
وخيره كثير
وبهجة حلال
ورزق حلال
طيور الفرح قدامى
ومادة لها الإيدى والقلب
طيور جاية معاها الحب
ومستنية رزق الله

عن الشاعرة

- عضو اتحاد كتاب مصر.
- حاصلة على بكالوريوس إعلام جامعة القاهرة.
- حاصلة على دبلومة الدراسات العليا فى مجال الإعلام.
- ديوان شعر بالعامية المصرية بعنوان (القصاص) - مصر
جاية - صدر منه ثلاث طبعات.
- ديوان شعر بالعامية المصرية بعنوان (على الشارع) -
حكاوي - صدر منه طبعتان.

المحتويات

٥	الإهداء
٧	كذب ملون
١٣	غريزة
١٧	وشين
٢١	طعم الهوى
٢٥	أول خطوة
٢٩	دموع القدس
٣٣	ألف تحية لجند بلادنا
٣٧	البيه الكذاب
٤١	هات وخذ
٤٥	اختلافنا حرب

٤٩	وردة حزينة
٥٣	الخلاص
٥٧	الحلم
٦١	احنا معاك
٦٥	الوعد والمكتوب
٦٩	مراكب عشق
٧٣	عيون دبايبس
٧٧	وحددي
٨١	باموت
٨٥	بمجة
٨٩	عن الشاعرة